

ЛҰИМА СЭРИПОС

10 января
2019 года
№1
(1187)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года

Йильпи 2019 тал та ёхтыс



В. Узель вәрум хури

Ты хурит Хальүс район Саранпавыт блнә мәныңи нәкве Оксана Михайловна Гоголева Коля пыге ёт пәсылым блнә. Оксана Михайловна мәнь нйвразыт ургаган колт рупины. Коля пыггәтә сака кәркамыт янығми, тав Эрни, ййкви, сәвсыр қасылыт қасы. Ты мәныңи колтағыл урыл 7 ләпсыт ловиньтән.

Ты
номерт
ЛОВИНЬТӘН:

Вәтихал
акван вос
хәнтхатыгләв

3

Няхшамвәль
павылт сав
тал яныг
ләккар ўраве

5

Ясунт павылт
яныгмам ойка

7

Сәсныл вәрим
пәс пормасыт

13

Хурит сунсыглым
лұимә мирыт
вәвет

16

2019 т̄л

Январь (Т̄л котиль этпос)

ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	31
ПТ	4	11	18	25	
СБ	5	12	19	26	
ВС	6	13	20	27	

Февраль (Р̄етың юсвой этпос)

	4	11	18	25
	5	12	19	26
	6	13	20	27
	7	14	21	28
1	8	15	22	
2	9	16	23	
3	10	17	24	

Март (М̄аньполь этпос)

	4	11	18	25
	5	12	19	26
	6	13	20	27
	7	14	21	28
1	8	15	22	29
2	9	16	23	30
3	10	17	24	31

Апрель (Яныгп̄оль этпос)

ПН	1	8	15	22	29
ВТ	2	9	16	23	30
СР	3	10	17	24	
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	

Май (Я̄нк н̄атнэ этпос)

	6	13	20	27
	7	14	21	28
1	8	15	22	29
2	9	16	23	30
3	10	17	24	31
4	11	18	25	
5	12	19	26	

Июнь (Л̄упта этпос)

	3	10	17	24
	4	11	18	25
	5	12	19	26
	6	13	20	27
	7	14	21	28
1	8	15	22	29
2	9	16	23	30

Июль (О̄йттур этпос)

ПН	1	8	15	22	29
ВТ	2	9	16	23	30
СР	3	10	17	24	31
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	

Август (В̄ортур этпос)

	5	12	19	26
	6	13	20	27
	7	14	21	28
1	8	15	22	29
2	9	16	23	30
3	10	17	24	31
4	11	18	25	

Сентябрь (С̄укыр этпос)

	2	9	16	23	30
	3	10	17	24	
	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	

Октябрь (М̄ань таквс этпос)

ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	31
ПТ	4	11	18	25	
СБ	5	12	19	26	
ВС	6	13	20	27	

Ноябрь (Яныг таквс этпос)

	4	11	18	25
	5	12	19	26
	6	13	20	27
	7	14	21	28
1	8	15	22	29
2	9	16	23	30
3	10	17	24	

Декабрь (В̄ат с̄аграпнал этпос)

	2	9	16	23	30
	3	10	17	24	31
	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	

ЛҲХХАЛЫТ

Ятил маныщи миртёв!*Йильпи 2019 тал ёт нанан сымыңыщ янытлыяну!*

Н. Меро́в ва́румхури

2019 тал Мә янытыл олнэ сосса мирыт щань латың талыг намайес. Таимәгыс нанан лавегум, ома́т, анекват-щәкват нявраманыл ос апа́н-ыл ёт щань маныщи латңыл пуссын вус потыртёгыт! Ты талт маныщи латың элаль тотнэ магыс нан сав емас вәрмал вус вәрегын!

Россия мәвт 2019 тал Театр талыг намайес. Уй йиквнэ пора маныщи ми́рув палт театр хольт о́лы. Йильпи талт алышлан сөт вус ошнувув, манки тўлыглапанув элаль савмалтан магыс ман ты ялпың хөталт пуссын вус атхат-нувув!

2019 тал мән Ханты-Ман-сийский автономный округут Колта́гыл талыг намай о́лы. Сав сөт, колта́гыл сым рёг нан вус ошсын, щәгталпы ёт ля-па рўтанын ос ма́хманын ёт вайхатуңке!

Ты талт манылат ма́хмытныл сав йильпи колта́гыл вус ёмты, тан мән маныщи ми́рув вус ёрмалтыяныл ос йис та́гыл олнэ накув, э́рганув-мо́йтанув элаль вус тотыяныл!

**Янытлан латың
Государственный Дума
депутат
Татьяна Гоголева тетыс**

Вәтихал акван вос хөнтхатыглэв

Тәл оигпан лятат Ханты-Ман-сийск үст «Югра лылыёп» органи-зация хөтпат танки рўпитан коланылн яныгпала экват ос ойкат мўйлункве вөвиньтәлсаныл.

Өвләт тан үст олнэ «Югра лылыёп» обще-ственный организа-ция 2018 тал сыс ва́рум рўпататэ урыл потыр хўнтлысыт. Ты тәлат өвылтыт Людмила Гу-рье́ва (Спи́рякова) по-тыртас ос Фаина Ишти-мирова мўйлын ма́хум ма́гыс кас варыс. Ты нәг сас үст олнэ мир ма́гыс савсыр тәлат ва́руңке

нётёг. Аквё́т тәлат элаль тотнэ ма́хманән ёт үс манос округ савсыр касылыт, ханищтапыт олнэныл порат тот ос нётсыт, тувыл хөнтлум ма́хманув кәстыглан ма́гыс касың тал «Бес-смертний полк» на-па акция́т хурит каты́т пувим ёме́гыт. Туи ма́нхәпыл касуңке ялантёгыт.

Таквсы порат Фаи-на Иштимирова Хан-ты-Мансийскат э́ргын, йиквнэ нәквет ос няврамыт акван-ат-санэ ос «Ёмвош ёх» танкинаныл намтса-ныл. Тув үст олнэ сос-са нёт ёхталёгыт ос тан савсыр ханты э́ргыт э́ргёгыт. Ань тан тот хўрум э́рыг э́ргысыт. Тан коньпәланыл Ма-рина Неттина, Марга-рита Фёдоровна Рябова ос Людмила Романов-на Хомляк э́ргысыт, йиквсыт, нас ошхуль ва́рсыт.

Маныщи хөтпат ан-самбль ва́рнэ ма́гыс ос акван-атхатуңке вө-вавет, манки пёс нака-нув ос вос суссылтыяну́в. Ань маныщи латңыл Мария Тихоновна Дви-нянинова Хәльүс район Хулюмсүнт павылныл ёхталан нэ ос Светлана Силивёрстовна Динис-ламова тәнки хансум стиханән ловиньтасы́г. Ты ва́рмал мўйлын хөтпатн сака му́стыс. Юван Шесталов хансум потре Альбина Нико-лаевна Мехнина, эщён,

ловиньтавес.

Мўй ма́хум тот акв-руш хум ёт вайхатасы́т. Тав наме Виктор Ни-колаевич Рыжов, о́йка лўимә олупсав урыл стихы́т хансы ос э́ргыг ва́риянэ. Ань тав гар-мошка́л ёнгыс ос Фа-ина Павловна ёт ак-вё́тэ́ргысы́г.Александр Михайлович Констан-тинов, яныгпала сос-са ма́хум Советы́т олнэ кўщай о́йка, ос такем нётнэ турсуил э́ргыт э́ргыс.

Яныгпала мўй хөт-пат пўмәшипа латың лавсыт, тан тамле мән вөвиньтанэныл по-рат пуссын щәгтёгыт. Фаина Иштимиро-ва лавнётэ щирыл, ань ялпың хөталы́т порат акван-хөнтхатыглаң-кве э́ри, тьи мән ял-пың хөталанув.

Мән, газетат рўпитан ма́хум, Йильпи 2019 өвылта́хтам та́лыл ма́хманув янытлыя-ну́в! Пус кәт, пус ла́гыл, ос Тө́рум ёт, Отыр ёт э́лаль олуңке ла́вия-ну́в!

Тамара МЕРОВА



Няхщамволь павылт сав тал яныг лёккар ураве

Хальүс район Няхщамволь павылт йильпи пұльница 2015 талт ұнттувес. Ты элы-палт павлың махум лов тал яныг пұльница-колт пусмалтавёсыт. Таяныт кирпащ кол-капай палтыглаңкве сака сав олн эрыс, тыммагсыл пұльница лап-пантвес ос това рұпитан хотпат пөхын кетвёсыт. Тамле тэла хунь вәрвес, павлың мир номтаныл шар ат патыс, тонт тан пуссын лавыгласыт, мұсхалыг пусмалтаңкве воссыг ат патавет.

Ань Няхщамволь павыл маңь пұльница кұщайг Валентина Михайловна Молодцова рұпиты. Махум хумус тот пусмалтавет, тав маңыщи газетав магсыл потыртас.

— Ань ты йильпи пұльницат 15 элумхолас рұпиты. 2015 талт яныгпөль этпост тыг вантлысұв. Мән районный пұльница нупыл ловиньтахтэв, олныл тувыл таставёв. Йильпи колт рёг, вит магсыл ань мощца олн холтэв. Та яныт кирпащ кол-капай воссыг ат палтыглаве, тасавит тал нас тох ұнлы, элаль нэматыр вәруңкве ат ке патаве, люлиг ёмты, лащал ёл та лоньхаты. Кұщайт өвлэт тот маңь ныврамыт ўргалан кол вәруңкве номсысыт, тувыл акв порат павлың

миркол махум тув вантлуңкве тахсыт. Ос касың этпос рёг, найпос магсыл тасавит олн ойтуңкве нәмхотьют ат вәрми. Кұщаянув ты вәрмал урыл акваг потыртасыт, ань, улпыл, хот-ёрувласаныл, нэматыр воссыг ат лавёгыт.

Яныг пұльницат аквторыг лов элумхолас пусмалтаңкве вәрмысанұв. 2010 тал пәсыл мот ширыл вәрвес, махум пұльницан йти сыс воссыг ат хультуптавёсыт, тан алпыл ёхталасыт ос йтипалаг юв миначыт, руц латңыл «дневной стационарыг» лававе.

Маңь пұльницан хунь вантлысұв, лёккар-кұщай мот мән рұпитаңкве минач. Тонт яныг лёккар-хотпа тал хультсұв. Ам тыт фельдшерыг рұпитэгум. Ань



В. М. Молодцова махманэ ёт ұнты

Н. Тасманова вәрум хури

мән лёккар-кұщай ат оныщёв, тыммагсыл махум пұльницан пинуңкве ос тыт пусмалтаңкве ат вәрмианұв. Хунь лёккар тыг ёхты, тонт ос аквта ширыл рұпитаңкве тах овылтахтэв. Сав тал яныг лёккар тал олэв, ты павылт рұпитаңкве нәмхотьют ат таңхи.

Ты элы-палт махманув келпаныл виңкве ос ёмашакв сунсыглаңкве мәнки вәрмысұв, тамле рұпата магсыл ищхипың утыт оныщёв. Молты тал ты рұпата вәрнэ нэ ос мот павылыл вантлыс. Махум келпаныл сунсыглаңкве воссыг ат вәрмёв. Ты вәрмал урыл районный пұльница кұщайт ос ёмашакв ваганыл, тан мот лёккар кинсёгыт кос, тувыл касащан хотпа ань тыг мус ат хонтсыт.

Ам Няхщамволь павыл пұльницат 15 арыгкем тал рұпитэгум, хосат пенсият олэгум, лёккар-хотпа тыт атим, таймагсыл пөхын ат минэгум. Няхщамволь аги Елена Алексеевна Артеева фельдшерыг Тобольск ұст ханищтахтас, ань юв ёхтыс. Тыт хум вә-

рыс, щаняге-ащаге ос тыт олэг. Тав ты пұльницат рұпиты, ам таве ань ханищтылум.

Ань 3 манос 4 тал касың тэлы порат Ханты-Мансийск ўсныл лёккарыт яныг машинал тыг ёхталэгыт, тот тан савсыр ищхипың утыт оныщёгыт, махманув хопсыяныл пөславет, келпаныл вивет ос майтаныл, сыманыл ёмашакв сунсавет.

Рётың юсвой этпост манос маңьпөль этпост Хальүс лёккарыт нывраманув ос рұпитан хотпанув сунсыяныл. Павлың махманув лёккарыт палт уральтахтуңкве пуссын ялантэгыт. Ань сав хотпанув рұпата тал олэгыт ос яныг ўсн пусмалтахтуңкве ялуңкве ат вәрмёгыт, олн ат оныщёгыт. Лёккарыт акв тал кит щёс Няхщамвольн ке ёхталалнувыт, тонт тай ёмаснув олнұв.

Туи порат Хальүс райоң янытыл лёккарыт «Николай Пирогов» нампә найңхәпыл яласёгыт, касың павылыл пұхталэгыт ос тот олнэ мир уральтэгыт. Мән палтув ты найңхәп ат ёхталы,



Яныг пұльница татлан ұнлы

Ищхипың матвим хуриов

витэ тыт сака мән. Тувыл элумхōлас тал сыс савсыр агмыл ем-туңкве вѣрми.

Юи-овыл талыт павлуvt кит-хүрум элумхōлас пувласпи-агмыл емтсыт. Тамле пиышмаң агм пусмалтаңкве сака тарвитың, тыммагсыл махумн ань ватихал уральтахтуңкве эри. Ты агм тара ке хонтаве, хотпа пусмалтаңкве вѣрмаве.

Лѣккарыт павлуvt хунь ѳхталѣгыт, мән Нѣрахи, Яныгпавылт, Усть-Маньят олнѣ махманув тиг вōвыглыяннѣ, лѣккарытн ѳс вос сунсавет. Тән ѳс мән пўльницав нупыл хансым ѳлѣгыт.

Нѣрахи павылт ань кит хотпаг Калинин-ѳйка ѳс Татьяна Семѣновна Тасманова туп ѳлѣг. Нѣвраманѣн Нѣхщамвѳль павылт ѳлѣгыт. Тәнаныл уральтаңкве ватихал ялантѣгыт. Ты павылт мус я хосыт 40 вѣрыста, тѣлы лѣңхе ватинувег ѳлы. Усть-Маньяпавылт 15 элумхōлас ѳлѣгыт. Я хосыт та павылт мус 100 вѣрыста.

Нѣхщамвѳльт ѳлнѣ щѣмьят ань та мат колыт ѳнттуңкве патсыт. Сав махум тувле нупыл няслуңкве, пум вѣруңкве ялантѣгыт. Тыммагсыл махманум хумус тот ѳлѣгыт, агмыл ке емталѣгыт, ам тара лѣвавем. Тот ѳлнѣ мир магсыл мән тѣрпи атсѣв, тәнанылн кѣтсѣв. Элумхōлас агмыл ке тот емты, тав ам палтум манос тара Хальѣс лѣккарытн свониты. Та павылт телефон рўпиты.

Павылт ѳлнѣ махманув тыт пусмалтаңкве ат ке вѣрмияннѣ, тәнаныл Ханты-Мансийск, Нягань, Советский манос Югорск ѳсн кѣтыяннѣ. Агмыл емтум хотпа

манаvн ѳвлѣт Хальѣсн кѣтуңкве кос эри. Тувыл махманув тув ялуңкве шар ат кѣсашѣгыт. Тара Советский ѳсн тыламлѣгыт, ѣлалъ Ханты-Мансийск манос Нягань ѳсн минѣгыт.

Тувле ялнѣ магсыл билет тынталнувег ѳлы. Та ѳсн ке минѣгыт, ам тәнаныл лѣккар палт телефон хосыт хансыанум, ѳс направление-нѣпакыл мыганум, тѳнт тара тот пирмайтавет. Хотпа илторыг матаре хотум ке емты, тав вертолѣтыл санрейсыл тара Хальѣсн манос Нягань ѳсн то-таве.

Сав тал ювле хуль-стум порат Нѣхщамвѳль яныг павлыг ѳлыс, совхозыт, колхозыт рўпитаманыл порат акв сѳтыра арыгкем элумхōлас тыт ѳлсыт. Тувыл кѣсың талныл мирув мощаг емтыс, тый магсыл павлуvt яныг пўльница лап-пантвѣс. Кўщаит мән павылквет ѳлнѣ махум пусмалтан магсыл сав олн холтуңкве ат таңхѣгыт.

Ань Нѣхщамвѳль павылт 447 элумхōлас ѳлы, тән халанылт 219 — сossa махум. Павлуvt 106 нѣврамыт ѳлѣгыт, тән халанылт 66 мән-щииг ловиньтахтѣгыт. 2018 тал сыс тыт хот нѣврам самын патсыт. 2017 — талт туп хўрум мань нѣврам. 2012 ѳс 2014 ѣмас талыг ѳлсыг, тѳнт тал сыс 12-14 савит нѣврамыт самын патсыт.

Тѣрпи тыналан вѣрмалъ урыл лѣккар нѣ лѣвыс, тѣрпи тыналан кол пўльницав хосат тагыл рўпиты. Акв порат лап-пантуңкве кусыглавѣс, ань ты кол ѣмашакв рўпиты, савсыр тѣрпи тот акваг тыналаве.

**Людмила
ТЕТКИНА**

Сossa махумн пенсия-олн ойтнѣ урыл

Округувт Пенсионный фондывт кўщаиг рўпитан нѣ Татьяна Зайцева пенсия-олныт ойтнѣ урыл лѣххал тотнѣ хотпат ѣлы-палт потыртас.

Кўщай нѣ лѣвыс, ань кѣсың талныл мән ѳлнѣ мавт ты олн винѣ махум савнуv емты. Округувт 440 сѳтыра элумхōлас пенсия-олныл ань ойттавет. Акв ѣтпос сыс тән магсыланыл пуссын аквѣт 8,5 млрд. солкѳви холтаве.

Ты ѣтпосныл ѳвыл хоталныл яныгпала хотпат олнаныл нѳхнѣтвѣсыт, тән акв сѳтыра солкѳвил савнуv виңкве патсыт. Сав махум 20 сѳтыра солкѳви савит пенсияныл ѳлы. ѳлнѣныл сыс ат рўпитам хотпат сѣккон щирыл пенсия-олныл ѳс ойттавет, тән акв ѣтпос 12 сѳтыра солкѳви савит олн выгыт.

Махум пенсиян квѣлнѣ урыл потыр ѳс ѳлыс. Ювле хуль-тум тал мән таквс ѣтпост Государственный Дума ийльпи сѣккон пирмай-тас. Россият ѳлнѣ хум хотпат 65 тѣланыл тѳвлын порат пенсиян патхатѣгыт тах, нѣт 60 тал мус рўпитаңкве лѣ-вавет.

Лўимѣт ѳлнѣ мирыт, мощ сѣртыннуv пенсия-олныл ойттуңкве ѳвылтавет. Хум хотпат 60 талт ѳс нѣт 55 тал тѳвлын порат рў-патаныл пѳхын минуңкве вѣрмѣгыт. Тувыл нѣ хотпа кит нѣврам ке самын паттыс, тав аквта щирыл 50 талт пенсия-олныл ойттуңкве ѳвылтаве.

Мәнщи, ханты ѳс ѣрн махум пенсияныл урыл кўщай нѣ лѣтың ѳс лѣвыс. Сѣккон щирыл хўл алышлым, сѣ-

лы ўрим ѳс вѳраим рўпитан махум сѣртын пенсиян патхатѣгыт.

Ты рўпата вѣрнѣ хум хотпат 50 талныл олныл ойттуңкве ѳвылтавет ѳс нѣт 45 тѣланыл тѳвлын порат пенсиял мивѣт. Хум хотпатын 25 тал, нѣ хотпатын 20 тал сыс тот рўпитаңкве эри, туп тѳнт пенсиян олн ойттуңкве ѳвылтавет.

Ювле хуль-тум талт вѳртур ѣтпост ты сѣккон пирмайтан ѣлы-палт Россия Президент Владимир Путин мирн лѣтың кѣтыс, тѳнт тав сossa мирыт урыл ѳс потыртас.

Ты лѣтың хўлым тѳва сossa махманув сѣртын пенсиян минуңкве щѣ-питахтасыт. Татьяна Зайцева лѣвыс, ты сѣкконт туп сѣлы ўрнѣ, хўл алышлан ѳс вѳраян махум урыл хансым ѳлы. Мѳт мат рўпитан сossa махум мѳт мирыт хольт 55 ѳс 60 тал тѳвлын порат пенсиян минѣгыт.

Кит ѳс тыгыл савнуv няврам ѳщнѣ щѣмьят «Материнский капитал» лѣвнѣ олныл ѳс ты фондывл мивѣт. Татьяна Зайцева ты урыл ѳс потыртас. 2007 тал пѣсныл мән округувт 127 сѳтыра арыгкем щѣмьят сертификат-нѣпакыл майвѣсыт. Ты олныт тән кол ѣвтуңкв, нѣврам хаништаңкв манос пенсиян пинуңкве вѣрмияныл. Мән округувт сав щѣмьят кол ѣвтнѣныл порат ты олныл ойтхатѣгыт.

**Людмила
АЛГАДЬЕВА**

КҮЩАИТ РҮПАТАНЫЛ

Тәрвит вәрмалын ярмын хөтпат нѐтавет

Молты тал оигпан порат округт мирн нѐтнэ нѐ Наталья Стребкова, нѐврамыт тѐланыл ўргалан нѐ Татьяна Моховикова ос тѐнки рупатаныл вѐрнэ хөтпатн нѐтмил вѐрнэ хум Николай Евлахов лѐххал тотнэ колн ѐхталасыт.

Ты кўщаит рупатанылт маныр тәрвитыт мўсхал щирыл щѐпитыяныл, тѐн ань ты урыл потыртасыт. Ань вѐтихал акванатхатыглѐгыт, тәрвит накн патум мѐхумн нѐтѐгыт. Тѐн щѐнитѐщит, нѐврамыт ос тѐнки рупатаныл вѐрнэ хөтпат ѐт рупитѐгыт.

Наталья Стребкова лѐвыс: «Мѐн палтум мѐхум савыңпалѐ ѐлнѐ кол урыл китыглахтуңке ѐхталѐгыт. Тѐват хотталы щалтум руптаныл коланыл тѐнки халанылт уртуңке ат вѐрмияныл. Тувыл субсидияолн винѐ мѐгыс ос пѐс колныл йильпи колн вѐнтлын вѐрмалы урыл китыглахтѐгыт. Ты тѐлатыт мѐхумн акваг нѐтмил вѐрѐв. Ёрнѐ нѐпаканыл акваг-атуңке нѐтѐв ос хоталы тотуңке хўлтыянў».

Округувт савыңпалѐ мѐхум ты вѐрмалит урыл нѐтмил вѐвѐгыт. Сѐв хөтпа пѐс колныл йильпи колн вѐнтлын мѐгыс ўрхатым аква юи-пѐлт лѐлѐгыт. Тувыл мѐхум ўрхаттѐл кол винѐ урыл китыглахтѐгыт. Тѐва ѐгмың хөтпат ѐгманыл хосыт колыл молях мивет. Тымѐгыс тѐстым программа рупиты. Ты программан хансым ѐгм ѐщнѐ яныг хөтпат ос нѐврамыт тѐн колыл мивет. Ос ты тѐлан ѐлнѐ колыт ат тѐвылхатѐгыт, сѐв ѐлумхѐлас

ўрхатым аква юи-пѐлт атхатѐгыт.

Ты тѐл тѐва ѐгмыт та программан хасвѐсыт, тѐват ос хотшуртумтавѐсыт. Тымѐгыс матсѐвит мѐхум пѐхын паттувѐсыт. Кўщай нѐ ты хөтпатн нѐтмил вѐрыс, сут тѐра тѐнаныл ювле ѐчерѐдын хассанѐ. Тувыл кѐсың ўс, район ос пѐвыл кўщайн пищмат кѐтыс, ты хөтпат хот ул вос шуртумтавет. Кўщайт ань тѐнаныл пѐхын ат выганыл. Ос хотты хөтпа хот-виңке ѐлымавес ке, тѐн нѐтавет тах.

Агмың-мосың хөтпат ос сѐв вѐрмалы ѐнѐщѐгыт. Тѐн ѐлнѐ коланылныл тѐнкирот кон-квѐлуңке вос вѐрмысыт, яласан лѐңхыл щѐпитаңке ѐрѐгыт. Ань ты хөтал мус округувт 5 сѐтыра тамле колыт уральтавѐсыт ос лѐңхыл туп 3 кол щѐпитавѐсыт, иң сѐв рупата вѐруңке ѐри. Наталья Стребкова сѐвсыр кўщайтн лѐтың кѐтыс, тѐн ты вѐрмалы щирыл нѐтмил вос вѐрѐгыт.

Анѐ пенсия олн винѐ мѐхум тѐват тѐнки мѐшинал ўщлахтын мѐн ялантѐгыт. Ты хөтпат пѐншин мѐгыс ювле олн ѐйтнѐ урыл китыглахтѐгыт. Кўщай нѐ хосат ты урыл потыртас. Анѐ ос мир номылматсаныл, фѐдеральный сѐкконт ты



Т. Моховикова, Н. Стребкова ос Н. Евлахов

тѐла щирыл нѐтмил ат хансыма.

Тѐн лѐвсыт, яныгпѐла хөтпат тѐнки мѐшинал миным лѐңхыт сакватахтуңке вѐрмѐгыт. Ос товылнѐхѐпыл манос нѐиңтуйтыл яласаңке патѐгыт ке, тѐнанылн нѐматыр лѐль ат ѐмты. Тымѐгыс мѐшинал яласанѐныл порат ат ѐйтавет. Ос ты тѐла нѐмхотѐют ѐмщакв ат ханищтастѐ.

Округувт Хѐльўс Ос Белоярский районыгт туп тѐлы лѐңхы вѐрыглаве. Тот ѐлнѐ мѐхум мѐшинал тѐлы порат ўщлахтуңке хотталы ялѐгыт ос олныл ат ѐйтавет. Тамле ѐлумхѐласн пѐншин ѐвтнѐ мѐгыс олн ювле ѐйтуңке кос ѐри. Ты вѐрмалы мўсхалыг щѐпитан мѐгыс кўщай нѐ Государственный Дума депутатытныл нѐтмил вѐвыс.

Тувыл тѐва мѐт савалап нѐврамыт 18 тѐланыл тѐвлын порат ѐлнѐ колыл тѐра ат мивет манос хоса ўрхатѐгыт. Ты вѐрмалы щирыл ѐс нѐтмил вѐраве. Та сыс, Россия

янытыл шар мѐк ѐмщакв тыт тамле рупата вѐраве. Кўщайт ты тѐла акваг уральтым ѐнѐщияныл.

Татьяна Моховикова нѐврамытн нѐтым рупиты. Тав ос ты урыл потыртас. Агмыңмосың хөтпат кол ўрнѐ ѐчерѐдил хот ул вос вуйвѐсыт, тымѐгыс налыман арыгтем сѐвит щѐс сутытахтын вѐрмалы вѐрыглавес. Ты ѐгит ос пыгыт анѐ йильпи ѐлнѐ колыл майвѐсыт. Ос ханищтап, пусмалтан ос мѐт тѐлат щирыл иң тәрвитыт ѐлѐгыт. Савалап нѐврамыт вѐрмалыныл мўсхалыг щѐпитан мѐгыс сѐв рупата вѐраве.

Николай Евлахов, мѐмѐнѐщи хум, тав ос тѐнки рупата вѐрнѐ хөтпатн нѐтмил вѐри. Мѐхум рупата олнаныл тѐра вос ѐйтвѐсыт. Вѐраян, хўл алыщлан, пил вѐтнѐ, лѐхс атнѐ ѐщинатн ос мѐт сыресыр предпринимателитн нѐтѐгыт. Сѐкконыт лѐльсаң вѐнѐ хөтпат хўлтыглыяныл, вѐритотнѐ порат ос сутыт тѐнаныл вуянтыяныл.

Николай МЕРОВ



Мāньщи колтāгыл

Ты хурит Оксана Михайловна Гоголева (такви опарищ наме Яптина) Михаил Константинович āтятэ ёт пōслым ѓлэг. Оксана Михайловна ань мāнь нйврамың садик-колт рўпиты. Ты элы-пāлт тав Сўкыръя пāвил школат лов тāл нйврамыт ханищтасанэ. Ойкатэ ѓс мāньщи хум, Евгений Викторович Гоголев. Тав Кимкьясуй пāвилныл ѓлы. Тэн тит нйврам ѓныщег, агитэн яныг классыт ханищтахты, Коля пыген иң мāнь, титыт классыт ханищтахты.

Āтятэ Михаил Константинович Яптин Хорыңпāвлыт 1954 тāлт самың патыс. Михаил āще Константин Михайлович Хозумов наме ѓлыс, оматэ Пелагея Илларионовна Яптина — Сўкыръя пāвил нэ. Михаил Константинович экватэ Римма Ясунт пāвил нэ, ты тāл мāньполь этпост тав 64 тāлэ тах тōвлы.

Ты колтāглын мāн сāв ёмас лāтың лāвев — сāв тāл пус кāt, пус лāгыл ѓлэн. Най-Ѓтыранын вос ўргалавѐн.

Ясунт пāвилт яныгмам ѓйка

Пѐс порат Ясунтыт сāв мāхум ѓлыс. Пāвилт сѓмыл охсарыт янмалтан перма рўпитас, тот рушит, хатанит, ёрныт, мāньщит пуссын рўпитасыт. Тувыл та мāхум лāкква та мингаласыт.

Та тэлы порат Саранпāвилт сāлың мāхум қаснэ порат акв ёрн хум ёт потыртасум. ѓвлэт лāвыс, тав Ясунтныл ѓлы, тувыл ущ наме лāвыстэ — Иван Григорьевич Хатанзеев. Хум такви ѓлупсатэ урыл тох потыртас:

— Ам 2019 тāлт сātлов тāлум тōвлы. Сортыңъя пāвилт 1949 тāлт самың патсум. Āтям Григорий Ванюта ѓлыс. Ос ам омам ѓпарищ намѐтыл хансым ѓлсум, тох та яныгмасум.

Мāн колтāглув яныг ѓлыс, сāв нйврамың.

Ам шар яныг ѓлсум, ам ёлы-пāлумт самың патсыт — Дарья (тав ань Сюркалова), Валентина (тав Панфилова), Григорий, Слава, Фаина, Елена (тав ань Бондарева), ос Василий. Ясунтын мāн 1954 тāлт āтявн тотвесўв, тавтōнтсāлың колт рўпитас.

Та пāвилт я вāта ляпатмāньщи экваг-ѓйкаг ѓлсыг — хум наме Иосиф ѓлыс, нэтэ Пелагея. Тэн мā-колт ѓлсыг. Āтявнтэн лāвсыг, щѓмьятэ мāгыс тэн мā-колэн ляпат ѓлнэ кол вос ўнтты. Мāн тот ты ѓлсўв, тот яныгмасўв.

Школан Ясунтыт минасум. Тōнт пѐс школа перма ляпат ѓлыс. Ётыл йильпи школа ўнттувес. Ам номилум, мāн хўрум классыт акв колнакт ўнлысўв. Сāвсыр нйврамыт — ёрныт, мāньщит, мōт мир нйврамыт, хотмус тот та ханищтавесўв.

Та пора номылматāлылум, сака пўмыщ ѓлыс. Мāн тасāвит нйврам, акван-атхатэв, та

хāйтыгтэв, та ёнгасэв. Тит нэг мāнав уральтасанэн — ты Галина Немдазина ос Маруся Калыгина.

Тувыл сѓмыл охсарыт янмалтан перма Саранпāвилн тотвес. Школа тāралап-пантвес ос тот рўпитан мāхум пуссын Саранпāвилн та вāнтлысыт. Ётыл мāн Ясунтныл мощ алгалнув вѓркол ўнттыгласўв, тув акваг ялантасўв, тот ѓлсўв. Тот ѓлмув сыс хўл пувсўв, вѓраясўв.

Щѓмьятэ урыл хум тох лāвыс — экватэ руц эква, наме Мария Федоровна. Тэн хот нйврам янмалтасыг, пуссын тāнти колтāглыңыг ёмтсыт, янас ѓлэгыт. Экваг-ѓйкаг лов апыгрищ ѓныщег. Иван Григорьевич элаль тох потыртас: «Ам хунь титыглавем, хотыл ѓлэгум — ювле тох лāвѓгум, ам Ясунтныл ѓлэгум, тот яныгмасум, мāк пāвлум ты». Тамле ты хōтпа ёт потрамасум.

Валентина ХОЗУМОВА



ПАВЛЫҢ МИР ӨЛУПСА

Сұқыръя павыл яныгхотпа



Ты хурит Хальүс район Сұқыръя павылт өлнэ яныгхотпа Василий Васильевич Канев пöслым öлы. Ойка тал котиль этпос 10 хоталэт 1932 талт саран колтагылт самын патыс. Ам тав ётэ хонтхатыгласум, потрамасум, öлупсатэ öвылтыт китыгласум. Василий Васильевич тох ты лавыс:

— Ам тыт Сұқыръя павылт самын патсум, яныгмасум. Омагум-агыгум öс акваг тыт öлсбг, тыт ёл-щёпитавесыг. Акв каңк ос хұрум увщи öщсум.

Эквам Агафья Сергеевна ёрн нэ öлыс, тав öс тыт яныгмас. Мён хот няврам янмалтасмён. Алексей пыгмён, Клава, Лена ос Марина агиянмён Саранпавылт

öлэгыт. Мань пыгумён Федя Афганистаныт армият лусытас. Тот сакваталвес, юв ёхталас, совхозт ұйхул пусмалтым сав тал рұпитас.

Совхозт ам 37 тал рұпитасум, сáлы ұрим яласасум. Тув палыт сáлыянув нёрыт ұриянув, тэлы ос вөр ман пöсыянув, Кульпас сыспáлт öныщиянув. Амти сáлыт öс öщсум. Пенсиян хосат минасум. Туи пум вáрегум, вөрн ялантэгум, пил вáтэгум. Эквам хосат атимыг ёмтыс, амттем öлэгум. Нявраманум, апыгрищанум ёхталэгыт, уральталавем.

— Василий Васильевич, наң маньщи мир халт яныгмасың, öлэгын, латңув улпыл ваглын?!

— Ам маньщи латңыл потыртаңкве хасэгум. Тыт сосса махум саран латңыл öс потыртэгыт, Василий Вьюткин ёмашакв хасы

потыртаңкве. Саранунов ос маньщи латың торгамтэгыт. Элнаң павлуvt Ый йиквнэ вáрмалъ вáтихал вáрыглавес. Ты пора тай ёмашакв номилум. Хотты хотпа пупáщи-кве кáтын-патты, тав колэт Ый йиквёгыт — тұлыглахтэгыт, эргёгыт, ошхультэгыт. Ам маньлат порат кит тал вóраясум, тóнт ман вóраян махум ёт кит пупáщи кáтын-патталасуv, 1948 тал порат.

Василий Васильевич сымың хотпа, нявраманён-апыгрищанён эруптаве, павыл махманён янытлаве. Ань ты этпост ты яныгхотпа намхоталэ öлыс, 87 талэ тóвлыс. Ман, газета вáрнэ махум, таве öс янытлылуv! Сав тал пустагыл вос öлы, Тóрум ёт, Отыр ёт вос öлы!

**Светлана
МАТВЕЕВА**

Махум я ұлтта унсуптан хум

Маньщи пыг Владимир Аркадьевич Сайнахов Саранпавылт öлы. Тав сака ёрнэ рұпата вáри — тув палыт Сұқыръя ос Саранпавыл махум йив хáпыл ос моторхáпыл я ұлтта унсуптыянэ. Туи Сұқыръя павылы ялмум порат, ты маньлат хум ёт потрамасум, манав тав Щёртың я ұлтта унсуптастэ.

Владимир лұпта этпос 11 хоталэт 1991 талт яныг колтагылт самын патыс. Омагэ Елена Каллистратовна, атятэ Аркадий Владимирович. Кит увщи ос каңк öныщи. Школа астаме юи-пáлт Владимир Тюмень ұст тэнут пáйтнэ хотпаг хаништахтас.

Рұпататэ урыл тав тох лавыс: «Ты тал ам яңк нáтнэ этпос 18 хоталёныл рұпитаңкве öвылтахтасум. Мён кит хотпа



яласымён, халумёнт пентхатымён, аква хотал ам яласэгум, мот хотал тав. Тув палыт рұпитаңкве патымён. Яныг таквс этпост я пöляве, яласаңкве та пойтэв. Я витэ мань порат тұпыл товимён, ошхунь öнты, махум моторхáпыл тыгле-тувле тотыглыянмён. Рұпата олныл ойтавемён. Йив хáпыл яласаңкве ануи мұсты».

Волода рұпататэ ул кос тарвистың, ос воссыг хоталь вáрхаты, махум тыгле-тувле унсуптаңкве эри. Руш эргыт лавнэ хольт, тав павыл махманён сав ёмас номт тоты, эруптахтын нёт ос хум хотпат акван-хонтхатаңкве нётыянэ. Ты ятил маньщи хум пускáт, пус лагыл вос яласы, Най-Öтыранён вос ұргалаве!

Светлана РОМБАНДЕЕВА

СОССА МИР ӨЛҮПСА

Ёрнкол тйвырт ӧщнэ пормасыт



И. М. Покачева



А. Н. Кантеров



С. В. Кечимов

Вӧрт ӧлнэ ханты мӕхум тӕл оиг-пан ӧлы-пӕлт Ханты-Мансийск ӱсн вӧвыглавӧсыт. Тӕн Белоярский ос Сургутский районнӕл ӧхталасӧйт, пуссын сӕлын мӕхум, сӕлыяныл ӱрим вӧрт ӧлӧгыт.

Мӕн округут «Союз мастеров» нампӕ организация ӧлы. Тӕн ань округ янытыл мӕщтырлан мӕхум тинсыяныл, тӕнаныл акв хотты яныг ӱст акван-атыглыяныл. Та мӕхум мӧт мирн вос суссылтӧгыт, хумус тӕн пӧс пормасыт вӕрӧгыт, нӕквет хумус ӱнсхатӧгыт.

Ань ты мӕхум халт нӕг-хумыг ӧлсӧг. Хум наме Александр Нико-

лаевич Кантеров, ӧкватӧ наме — Ирина Максимовна Покачева. Хумань йивныл хоса аны ӧргыс, нӧтӧхасапӱнтыс. Ӗкватӧ такви урӧтыл мощ потыртас:

— Ам ӕтӕм ханты хум ӧлыс, омам ӧрн нӧ, амти ӧпарищ намум Покачева ӧлыс. Мӕн вӧрт ӧлсӧв. Ам хум вӕрсум, ӧйкаментыл нила нӕврам ӧщсумӧн. Тувыл тав ӕтимыг ӧмтыс, ам амттем нӕвраманум

янмалтасанум. Пыгагум ос ӕгиягум янас ӧлуӱкв патсыт, ам ос амттем сӕлыяным ӧт вӧрт та хулытсум. Амти «Бураны» яласасум.

Аквмат порат ам палтум ты юртум ты ӧхтыс. Тав ӧс сӕв тӕл нӧ тӕл ӧлыс, ӧкватӧ хотталы шалтыс. Хӧт хӱлме, ам амттем ӧлӧгум. Та ӧхтыс. Лӕви: «Ам амттем ӧлым вагтал патсум». Тувыл ам палтум та вӕнтлыс. Ань ловмантем тӕл аквӧет ты ӧлымӧн. Тав такви сӕлыянӧ ам ӧлнӧ мӕмн нӕвлысанӧ. Тӧва порат тав ӧлум мӕтӧн ялымӧн, уральтымӧн.

Ирина Максимовна сака нӧмса нӧ, тав руш лӕтныл мощ лӱльсанув потырты, потыртаӱкв сака ӧссамтас. Лӕви, нӧмхуньт яныг ӱсн ат ялыс, ань ӧвыл шӧс Ханты-Мансийск ӱсн ӧхтыс. Такви ӱнтум сахитӧ суссылтастӧ, сака мӕщтырыг ӱнтме.

Ты нӕг-хумыг ӧт Сергей Васильевич Кечимов ӧхталас, тав ӧс та ӧрт ӧлнӧ ханты хум. Нӕйтыг

лӕваве. Ань ӱсувт тав ӕпа тагатан вӕӱкрип хӕлӕйивныл ӧргыс. Акв хӧтал ӧргащлахтас, йиве та ӕстыс. Татем вӧвтаг ӧргыстӧ, мӕхум маттем та пӱмшалахтасыт.

Нӕквет халт Мария Григорьевна Ӗккерт ӧлыс, тав ӧс ӕс нӧ. Тӕн пуссын аквӧет хасап ӱнтсыт. Нӕкве тох лӕвыс, ӕс мӕхманыл сӕвсыр мӕтт ӧлӧгыт, тӧват ӕс я вӕтат, тӧват ос хӧтал нӧглын ӧр нупыл. Тӕн тӕнти щирыл хасап йинӧгыт. Титыт хӧталт ӱнтуӱкв та ӕстысыт, хасапаныл мирн та суссылтасаныл.

Ты семинарт мӕхум хӱрум хӧтал рӱпитасыт. Ӭи-ӧвыл хӧтал кон яныг ӧрнкол тӱштӱвес, ань мӕщтырлам порманыл тот суссылтавӧсыт. Ты ӧхталам мӕщтыр хӧтпат янытлыманыл порат лӕввӧсыт, сӕвнӱв вос мӕщтырлӧгыт, щаквӧӧгыт. Тӧнт яныг намыл мивет ос пенсия-олнаныл тах мощ нӧхнӧтавет.

Валентина ВАСИЛЬЕВА



Мӕщтырлам хӧтпат

НЯВРАМЫТ МАҢЫС

Няврамыт палт Ащирма ойкат ёхталасыт



Ханты-Мансийск үст өлнэ «Лылын Хсёюм» хаништахтын колн хурум Ащирма ойкат (рущ щирыл Дед Морозыт) Түйт агияныл (Снегурочканыл) ёт ёхталасыт.

Акв Ащирма ойка Китай маныл олыс. Акваныл ос сака пәхвың, карс ойка-капай, тав насати Великий Устюг үст олы — Россия янытыл шар мак Ащирма ойкаг лававе. Мән мәнвн хот-мусёхтахтам, няврамыт ёт тыт ты поргащлы, йикващлы.

Ты колт рүпитан махум ос няврамыт тән маҕсыланыл уча концерт щёпитәлсыт, мәнщи ос ханты эргыт эргысыт, йиквсыт. Пуссын мәнщи супыл масхатым олсыт. Ащирма ойкат ос Түйт аҕит сосса няврамаквет нупыл щәгтым суссыт, кәтпатта рәтсыт. Ты мүй хотпат хургың тагыл, мүйлупсаң тагыл ёхталасыт, кәсың няврам мүйлупсал мисаныл.

Тувыл ос Ащирма ойкат йиквункве тұлхатасыт. Китайныл ёхталам хум рущ ләтңыл «Калинка» эрыг эргыс. Турсуе татем суиң олыс, хоса тәпыл эргыс, няврамыт суйтәл үнлахолсыт, пүмщалахтым хунтлысыт. Ты юи-пәлт шар мак Ащирма ойка аҕиришит-пыгришит ёнгалтасанэ — касылыт ос сыре-сыр ёнгильт вәрыглас. Няврамыт маттем та мовиньтасыт, ёнгасасыт, щәгтым хайтыгтасыт.

Ащирма ойкат хаништан хөтпатын ос няврамытын йильпи тәл кастыл сәв ёмас, сымың ләтың ләвсыт, ос ёмас улум вәрсыт, элаль мот няврамыт палт та нёвумтасыт.

Светлана МАТВЕЕВА

Түйтныл вәрим хурит

Тәл оигпам порат Ханты-Мансийск үст өлнэ махум түйт хурит варсыт. Ты касыл 2014 тәлныл щёпитәлаве. Хотьют шар нётнэ хури вәри, тав нөх-паты ос мүйлупсал миве.

Ань ты порат сәв хөтпа түйтныл хурит пөщгункве кәсәсәсыт. Ёс котилыт «Борис Лосев» намба ўшлахтым мāt сәв нётнэ түйт утыт тўщ-тувёсыт.

Ты хурит вәрнэ маҕыс коммунальный службат рүпитан хөтпат тән түйт акван-атсыт. Мәлтып порат атам түйт тотапыт кивыри пәхвтысаныл.



Түйт тот сурмыг ёмтыс. Ань ты түйт щупатыл сәвсыр нётнэ хурит махум ты вәрсыт. Хотьют мән мәнтыл, хотьют сәграпсупыл түйт хот-осгәщлас. Пуссын аквә-



ёт налыман нупыл ат хури вәрвес.

Түйт хурит нила каснэ щирыл вәрвёсыт. Ты ёмнэ ос хайтнэ хурит, мөйт ос кина матыр хурит ос түйтыл вәрим



няврамың щёмьят. Ты түйт хурит жюри-хөтпатн сусвёсыт ос нөхпатум махум мүйлупсал майвёсыт.

Николай МЕРОВ

Сәсныл вәрим пёс пормасыт

Пёс порат
Мәхманув
 ләпканыл ёвтнә
 пормасыл хунь олсыт,
 тәнти хумус хәссыт,
 таи вәрсыт. Мәнь
 нъяврам хуюптан
 апат, сәныт, сөвтыт,
 пайпыт, сәс тотапыт
 ос мот эрнут тәнти
 ёнтсыт, тувыл ос
 кәсың пормас хансал
 щуртсаныл.



Н. Н. Загайнова



Ань тамле пормасыт сунсуңкве ам «Галерея-мастерская Г.С. Райшева» колн ялсум. Тот «Орнаментированная береста обских угров» суссылтап ос хаништап вәрыглавес. Нәквет сәв пәлыл яныг үсн вөвиньтәлвёсыт. Ханты нә сәв олыс ос мәньщитныл Нина Николаевна Загайнова (Вьюткина) ёхталас.

Выставкат ам омам Акси́нья Степановна Мерова ёнтум апатэ, сөвтанэ, пайпе, сәс а́канянэ, сәнэ, шумпыл суссылтавёсыт. Наталья Николаевна Фёдорова, искусствове́дыг рупитан нә, ләвыс: «Мәнь ань мәньщит халт сәс пормасыт хансал мәщтырыг щуртнә хөтпа аты хөнтсүв. Акси́нья Степановна Мерова тав юи-өвыл мәщтыр хөтпа олыс, тав юи-пәлэт ань нәмхотыют а́тим, ты

сака сәль. Мәнь ань туп тав вәрум пормасанэ сунсыглэв, тув сунсым хаништахтэв. Тахольт ты пормасыт мәнь а́гитэ́н ўргалым о́ныщавет ос ма́н та́наныл сунсыглаңкве висанүв. Пёс ма́хум ёмщакв васа́ныл, хоты ханса хоталь щуртуңкве рөви ос хоты ханса нас пормасн вәруңкве ат рөви.

Совныл манос нуйныл ханса вәрнэ порат, тав өвлэт пөславе, тувыл ущ яктаве. Тыт сәс тармыл тох нәмхотмус ат вәруңкве, мәщтыр нәквет тара щуртыяныл».

Искусствовед-нә потыртаме порат яныг хурит суссылтас. Төнт лавыс: «Хальүс районт Ясунт пәвылт хосатнув хотты пёс сүмъях ёлыпәлт сәс тотап хөнтсум. Тав щар пёсыг ёмтум, хот-лоньхатам ос хансанэ иң сака ёмщакв

на́ңксыт. Ам таве вислум ос Тюмень үс музейн тотыслум. Хансат тот сака мәщтырыг вәрим о́лэгыт, нәматыр арыг а́тим».

Ты хусапсовыт халт аква ләви ос Хөрыңпавылт хотыютныл вис. Хотыютын вәрвес ос ат ва́гтэ. Ам тавё́н ху́лтыслум, ләвсум, омам о́лмёт потыртәлыс, тав а́кве Дарья Викторовна Анямова сәсныл матыр-а́ти сака ёнтыс. Ёнтум утанэ аквты щёс хансал щуртлыгыянэ, тамле сәс тотапыт молях вәруңкве хәсыс. Ам таимәгыс сәс тота́пе ханьщислум, омам увщитэ (ам а́квум) Дарья Степановна Анямова мәщтыр рүт нэв ёнтум сәс тотап о́ныщас, амти самыл вәслум, мәнь порат акваг сунсыгласлум. А́квум тот ё́нсхатнэ то́рлөмтанэ, сәтапанэ о́ныщас. Ос акв тамле сәс тотап Саранпавыл музейт о́ныщаве.

Ань Ханты-Мансийск үсн сәв ханты мәньлат нәт ос яныгпәла э́кват ёхталасыт. Ты э́лыпал таквсы порат Белоярский район Касум пәвылт нәквет акван-атхатыгласыт, сәсныл сәс тотапыт, хусапыт ёнтсыт. Ань ос яныг үсн вөвыгла-

вёсыт, учёный ма́хум та́нанылн хансат урыл потыртасыт.

Наталья Фёдорова сәс пормасыт пөслым хурит суссылтамёт ләвыс: «Това пормасыт сака пёсыт ос та́н ма́н ма́гсылув яныг тын о́ныщэгыт. Буклет-нәпак вәрнэв порат та́наныл пуссын тув пөслыянүв».

Выставкан атах-хөтах а́па тотыма. Та́н пуссын та́нти щирыл ёнтым о́лэгыт. Хансал ос кәсың нә такви щирыл щуртытэ. Ос ўлум ўй пуссын а́па сыст нумын пөслыяныл. Омам ёнтум а́па сыст ўлум ўй пөхат ингыт щуртым о́лэгыт. Ос Наталья Фёдорова ләвыс, ты това а́патыт ўлум ўй ла́гланыл ху́рум консыл пөславет, ты таимәгыс ўй пөхыт тамле хансат ос вәравет. Ам ё́тум тав ат кәсащас, таимәгыс ам мәньщи ма́хманум титыглаңкве та́ңхёгум, на́н э́рың яныг ма́хманныл ты урыл ху́лыгласын. Ы́лум ўй пөхыт маныр пөславе ос хумус ләваве. Атиңк ванэ хөтпа сака мо́щща ху́лтыс, ва́нэ э́лум-хөлас те хөнтэв, сака ё́мас о́лнув.



Ю́нсхату́ңкве ё́хталам А́с нә́т

**Галина
 КОНДИНА**

Маҳум рўпитаңкве тыг ёхталэгыт

Ювле хульгум талт округ Общественный палатат рўпитан хётпат акван-атхатыгласыт. Тув полиция ос мот мят рўпитан хётпат вовиньталвёсыт. Ань ман округувн мот хон маныл савсыр маҳум рўпитаңкве ёхталэгыт. Хумус тан тыт олэгыт, маныр тарвит вәрмалит оньщёгыт, ты урыл потыртасыт.



Молты тал Россия Общественный палата кўщай хум касыл щёпиталыс. Ты вәрмалы руц щирыл «Мой проект — моей стране» намаим олыс. Тот «Школа мигрантов» нампат тэла щирыл Яна Белова, Ханты-Мансийск ўст олнэ нэ, нох-патыс. Ань тав ты ханищтап колт кўщай нэг рўпиты. Ты сапрәнит элыл ёхтум маҳум урыл тав тох лавыс:

«Округувн элыл тыг рўпитаңкве ёхталан хаштал хётпат ман олнэ-хўлнэ накув вос вағаныл, тан ты школат руц латңыл потыртаңкве ханищтавет. Пес йис тагыл маҳум хумус тыт олсыт, та урыл лекцият ловиньтэв. Сакконыт урыл тананылн потыртэв. Тыт олнэ мир олупса урыл тан савнув ваңкве патэгыт ке, эрың, лўль вәрмалы мощчанув ёмты, маҳум халанылт юртыңыг олункве патэгыт».

Округн сав мир рўпитаңкве ёхталы. Тан тыт мори ул вос яласэгыт, овыл ул вос вәрэгыт, таимагыс акваг уральтавет. Полиция кўщай ваңын хум

Антон Шумков ты урыл потыртас. Тав лавыс:

«Ман округувн маҳум савыңпалэ Таджикистан, Узбекистан, Украина, Киргизия ос Азербайджан маныл ювыт. Тыт сав тамле хётпа рўпиты. Тан таланыл округувт тарвитың паты, рўпитан хётпа ат товылхатуңкве паты. Тувыл виза-нэпак щирыл Китай, Германия, Турция ос Канада маныл товат рўпитаңкве тыг ёхталэгыт. 2018 талт китсат арыгтем тамле хётпа рўпата нэпакыт варсыт. Тан аквёет округ бюджетын акв млн. савиткем солкөви нәлок-олн ойтсыт».

Ос тамле вәрмалы олыгылы, элыл тыг ёхтын маҳум, товат эрнэ нэпаканыл мўсхалыг ат щёпитыяныл, сытамыг рўпитэгыт. Миграционный полицият лусытан хётпат тананыл пувияныл ке, ты ошмараныл магыс олнэ мананылн ювле кётавет. Миннэ лёңханыл ойтнэ магыс олн ат ке оньщёгыт, тан өвлэт каснаколн мощчан ўнталавет.

Тот ты хётпат миннэ лёңханыл магыс олн сэлэгыт, тувыл уц юв кётавет. Молты тал оигпан мус тот яныгсат хўрумхуй-плов элумхолас ошвёсыт.

Полиция кўщай пхум лавыс, ты тал сыс округувт ват нупыл хўрум сөтыра элумхолас пуввёсыт, тан эрнэ нэпакыт тал рўпитасыт. Ты маҳумныл сут тара танки мананылн хўрум сөтыра савиткем элумхолас кётвес, мотаныт танки нэпаканыл ёмщакв щёпитаңкве лаввёсыт. Ты хётпат рўпитан маныл акваг уральтавет. Хотьют пуваве ке, тара юв кётаве, рўпата кўщайт ты ошмараныл магыс ос яныг штрафыл хансавет. Та сыс, элыл ёхтум маҳум халт ань округувт лўль нак вәрнэ хётпа мощчагнув ёмтыс.

Ты сапрәнин таджик маҳум халт кўщай хум ёхталас. Такви маҳманэ ярмын тэлат урыл потыртас. Хум лавме щирыл, тованакт тыг ёхтум хётпат ләпалалавет. Рўпата патхатнэ магыс элумхоласн

өвлэт пўльницат уральтахтуңкве эри. Тот тан лёккарытн хасхатан нэпакыл мивет. Ос ты маҳум пўльницат ат уральтахтэгыт, ты нэпак пөх хётпатныл ёвтэгыт. Тувыл ты ошмараныл магыс тан пувавет ке, юв кётавет манос штраф-олн ойтэгыт. Ос хотьют ты нэпакыт тыналан хётпат ат новавет, тох та элалы рўпитэгыт.

Общественный палата кўщай нэ Ирина Максимова ты вәрмалы ёмщакв уральтахкве полиция хётпат вовсанэ. Ты сапрәнит кўщайт маныр урыл потыртасыт, та таланыл пуссын нэпакн хассаныл. Ты рўпата таимагыс вара-ве, савсыр маныл ёхталан мир тыт нәлок-олн вос ойтэгыт, юртыңыщ вос олэгыт ос халанылт вори ул вос тотэгыт.

Овыл хурит таджик маҳум кўщай пөслым олы. Китыт хурит ос Общественной палатат рўпитан хётпат ўнлэгыт.

**Николай
МЕРОВ**

Ятил мātэ янытластэ

Ханты лātңыл ос Хруц лātңыл стигхт хансум хум Владимир Семёнович Волдин кāстыглан мāгыс мāхум «Тōрум Маа» музейт атхатыгласыт. Ты накт Литературная гостиная тох намайлевес: «О людях, о судьбах я думаю часто...», ханты мир поэт Владимир Волдин стиханэ ловиньтавёсыт, тав овылтытэ потыр хўнтлысўв.

Технолог-педагогический колледжит рўпитан мāньщи нэ Альбина Станиславец тох лāвыс: «Ханты поэт хосат āтимыг ёмтыс, мōлты тав 80 тālэ тōвлынув. Хум олыс те, сāv ёмас стихыт, сāv потырит хаснув. Овылтам тēланэ вāруңкве ат та āлымас. Тыхōтал музейн мāн студентыт ёт ёхтысўв, тāн ты мўтраң хум стиханэ ханищтасаныл ос ань ловиньтасаныл. Тамле Литературная гостиная Юван Николаевич Шесталов колнакёт кāсың этпос вāрыглаве, мāньлат āгит тыг ёмас номтыл ёхталёгыт, намың-суиң сосса хōтпанув стиханы ловиньтёгыт».

Владимир Семёнович педучилище āстламе юи-пāлт Ханты-Мансийск ўст радио колт рўпитас, ханты лātңыл передачат вāрыс. Округ янытыл яласас, ханты мāхум ёт хōнтхатыглас, сāv мōйт, эрыг, пёс йис потыр магнитофоннын хансыглас. Ёл-хансыглам потранэ радио колт пуссын акван-атым олёгыт, ўргалым оныщавет. Венгриянын ёхталам учёныйн нэ Ева Шмидт ты ханты хум акван-атыг-



Т. В. Волдина

лам эрганэ, пёс потранэ такви палтэ магнитофоннын хассанэ, Венгрият ос Эстоният олнэ архив колн тотсанэ.

Радио колт рўпитае порат экватэ Мария Кузьминична Волдина ёт акван-минасыг, Таня āгитэн самын патыс. Ты мўтраң поэт кāсың стихёт олнэ мātэ ос щāнь лātңе урыл хансыс. Тав хансыглам стиханэ, потранэ школат ханищтахтын нэпакытын хасвёсыт, ань нйврамытн ловиньтавет.

Поэт āгитэ Татьяна Волдина тох

лāвыс: «Ам тālум туп тōвлыс, хунь āтям āтимыг ёмтыс. Рўтанэ ос пāвыл мāхманэ тав урёт потыртālёгыт, хурия-нэ олёгыт, сунсыглыя-нум, хансум нэпаканэ ловиньтыя-нум. Тав тālэ яныгмасум, ос сома акваг ам ляпамт олыс.

Мāнь тāгыл тав яныгмам мātэн ялантасум, Кышик пāвылн. Пāвыл мāхманэ таве номияныл, сымың лātңыл кāстыяныл. Омам рўтанэ Касум пāвылт олёгыт, таве ос сака эруптыяныл. āтям хосат āтим, ос хунь турсуе радио хосыт сумыллы,

тāн лйōньщин ёхтавет, самвитаныл нёглёгыт».

Мāньщи поэтыв Юван Шесталов, ёрн поэт Леонид Лапцуй ос мōт нэпак хаснэ хōтпат стиханыл тав ханты лātңыл толмаш-лālсанэ. Юван Николаевич эще Альбина Мехнина тох потыртас: «Юван каңкум Владимир Волдин ос Миккуль Шульгин урыл акваг лāвсас: «Ты ам āпшиягум». Улпыл таимāгыс тэн нуплэн тох лйāлāлыс, тав ань 50-й тāлыт порат хансуңкве овылтахтас, ос ты āпшияге мощ ётылнуве, 60-й тāлыт порат, овыл стиханэн ловиньтасанэн. Ты хўрум поэт акваёт ам сāv щёс вāщинтālсанум, ань хольт номилум, ўнлэгыт, потрамёгыт, стигхт хансёгыт. Сосса мираныл, щāнь лātңаныл овылтыт потыртасыт, яныгмам мāнаныл ўлыласаныл».

Владимир Семёнович тōва потранэ, стиханэ хомле хаснэйивыл хассанэ, тох и оныщавет. Татьяна Владимировна лāвыс, тав ань āтятэ хўлюм потырит ос стигхт нэпакыг вāрнэ мāгыс акван-атыанэ, эрнэ щирыл щёпитыянэ.


Светлана РОМБАНДЕЕВА



Светлана Менделева потырты

НЯВРАМЫТ МАҢЫС

Элаль ӧлнэ ёмас номт вос ӧщсыт



Сергей Заикин



Руслан Вьюткин

С. Ремизов-вӧрум хуриянэ

Ханты-Мансийск ўст нӧпак ловиньтан колт рўпитан хӧтпат «Мой род, моя семья» касыл щёпитӧлсыт. Касыл 12-17 тӧл яныт ӧгирищит-пыгрищит маґыс ӧлыс. Тӧнанылн тӧнки рўтаныл ӧвылтыт матыр тӧра-паттуґкве ос потыр хансуґкве ӧрыс. Ань 23 нӧврам потрыт кётсыт ос тыгыл 15 ӧгит ос пыгыт нӧпак ловиньтан колн щӧняныл-ӧщаныл ӧт потрыт ловиньтаґкве ӧхталасыт.

Тамле касыл тот рўпитан нӧ, Алла Иштимирова-Посохова щёпитӧлыс ос тавӧн Сергей Ремизов, Надежда Постика нётсыґ. Овыл потыр «Мои предки — Сатыгинские князья» Злата Фомина ловиньтас, тав оматэ рўтанэ щирыл мӧньщи кӧнащ рўтныл ӧлнӧтэ. Ты тӧлат тӧра-паттуґкве анӧкватӧн нётвес, тав пӧс нӧпакыт пуссын акван-атсанэ.

Нӧлолов тӧл яныт пыгрищ Александр Токарев Анатолий Иванович Глухих яныт ӧпатэ, урыл «История ордена Красной звезды» потыр щёпитас. Тав ӧтятӧн архив колн тотыглавес, тӧн тот пӧс нӧпакыт китыґласыґ. Тӧва хӧнтлам вӧрмалит хўлтыґлаґкве ат тӧртавет, тӧн тӧнки рўтныл матыр-ӧти тӧра-паттысыґ ос хурит суссылта-сыґ.

Екатерина ос Николай Панченко Николай Иванович Хозумов, ащӧйкатӧн, урыл яныт потыр хасмыґ. Кит яґпыгыґ Владимир ос Михаил Хромовыґ ос тот ӧлсыґ, акватэ ханты ащӧйкатэ урыл, мӧтанэ эвенк ӧпатэ урыл потыртасыґ. Тувыл ащӧйкатӧн ос ӧпатӧн мӧньлат пора хуриянӧн суссылтанӧтӧн порат мўй махум лӧвсыт, пыгыґ такем тӧн нупылӧн хартавеґ. Елизавета Посохова ос Вероника Обаде Ялпус пӧвылт ӧлум рўтанӧн ӧвылтыт потыртасыґ.

Тӧнки анӧкваныл, щашӧкваныл, ащӧйканыл ман ӧпаныл урыл Жасмин Мерова,

Мария Фоминых, Руслан Вьюткин, Мария Юмашева, Мария Головина, Роман Ведров, Сергей Заикин потрыт ловиньтасыт. Нӧврамыт пуссын сертификат-нӧпакыл мўйлуптавеґсыт. Ты ӧлы-пӧлт нӧврамыт китыглавеґсыт, тӧн тӧнки рўтаныл ӧвылтыт нӧврамытын манрыґ ванґкве ӧри? Тӧн лӧвсыт: «Мӧн тӧн ӧвылтыт ванӧв маґыс моґ тӧксарыґ элаль ӧлуґкве патӧв, тӧнаныл янытлаґкве ос номуґкве ӧри».

Тувыл Алла Иштимирова-Посохова тӧн маґсыланыл «Маленький таёжник» нампа хурит суссылтан тӧла урыл потыртас. Тот ханты, мӧньщи ос ӧрн нӧврамаквет мӧнь порат пӧслым ӧлӧгыт. Акв тамле суссылтап тӧн Ханты-Мансийск ўс мирколт вӧрыґла-сыт. Тав «Миг и Вечность» намтым ӧлы. Тот сossa мирыт хумус пӧс порат ӧлсыт, мӧнь вӧрсыт, та ӧлупсав хурит щирыл суссылтаве. Пӧс хурин пӧслым махмыт хоты пӧвылт, хоты щӧмьят ӧлсыт, Аллан пуссын элаль ханищтавет. Ос мӧн мӧт порат тах ты урыл нӧнан хансӧв.

Тамара МЕРОВА



НЯВРАМЫТ МАҢЫС

Назым я ватат олум хум



Ам яныг ащойкам - Молданов Михаил Ефимович 1916 талт яңк нәтнэ этпос атыт хоталэт Тобольский губерният Большой Вар павылт самын патыс. Та павылт тав щемьян тагыл 1957 тал мус олыс, тувыл Ханты-Мансийский район Кышик павылн олункве вантлас.

1942 талт яныг ащойкам повестка-нэпакыл Омск үсныл кетвес ос хонтлаңкве вуйвес. Тонт Михаил Ефимович ос экватэ Наталья Ефимовна хұрум няврам ошсыг: Маша, ам анэквам Лена ос Кирилл.

Овлэт тав мот хумыт эт Омск үсн тотвес, тот писалил пәтлуптаңкве хаништатвес. Ос аквата талт ват саграпнал этпост хонтлаңкве минас. Яныг ащойкам Ле-

нинград үс вуянтым хонтлас. Тонт Ленинград үст олум махум марылтым ошвёсыт.

Тэлы порат Ладожский түр хосыт машинал яласан лёңх вәрвес. Ты лёңх хосыт тәнүт ос мот эрнэ пормасыт Ленинград үсн тотвёсыт. Яныг ащойкам ты лёңх вуянтым сав этпос хонтлас. Тонт сака тәрвитың олыс, сав мир тот порсысыт.

1944 талт тал котиль этпос 27 хоталэт Ленинград үс блокадатэ хот-вуйвес. Ты юи-палт ащойкам Эстония ма вуянтым хонтлас. Та порат тав сапёрыг хаништатвес ос та мят минат кинсыс. Пилтәл хонтламе магсыл маглын тагатаң пөсыл майвес. Китыныг саквататвес ос пұльницат пусмалтавес.

Михаил Ефимович Берлин үс мус ёхтыс. Та үс магсыл хонтлым ос сав махум порславес, ам ащойкам лылыңыг хультыс. Тав хонтлым сака вәгтәл патыс, аквматэртын ёл-оилматвес.

Тувыл нөх-сәйкалас, тав пөхөт махум щәгтым рөхсыт: «Победа!», «Победа!» Ты юи-палт ащойкам иң акв тал армият тотыглавес, ювле туп 1946 талт лүпта этпост ёхтыс. Тав ётә хонтлаңкве минам хум хөтпат пуссын порславёсыт, павылн тав таккөт туп ёхтыс. Яныг ащойкам «За отвагу», «За оборону Ленинграда», «За Победу над Германией» маглын тага-

тан пөсытыл майлуwes. Ты копыпал тав «Орден Отечественной войны I степени» онышас.

1957 талт тав щемьян тагыл Кышик павылн олункве вантлас. Сав тал тав колхоз кұшаиг рұпитас. Павлың мир Михаил Ефимович сака янытласаныл ос эруптасаныл. Колхозыт акван-тұлым юи-палт тав хұл алышлан ос вөраян хумыг рұпитас, тувыл пенсиян патхатас.

1970 талт тав «За доблестный труд в ознаменование 100-летия со дня рождения В.И. Ленина» наппа маглын тагатаң пөсыл майвес. Яныг ащойкам 1986 талт сұкыр этпос 13 хоталэт атимыг ёмтыс. Тав Кышик павылт ёл-щөпитавес. Ам таве нәмхуньт ат вәшиньтаслум ос тав урөтыл сав потыр хұлыгласум. Амки яныг ащойкамтыл сака янытлахтэгум.

Аня Падерина кетум потыр Людмила Теткина мәнщи ләтңыг хансыстә.

14 тал яныт агит-пыгыт паспортыл майвёсыт

Олеся Ткачук Ханты-Мансийск үст өлнэ аги, маңавн ляххал кётыс. Тав ос 14 тал яныт мот агит-пыгыт РФ Конституция ялпың хоталт паспортыл мүйлүптавёсыт.

Олеся маңавн хансыс: «Амки паспорт катыт онышункве хосат тахсум. Төва юртанум оныщөгыт, ам иң үрхатасум. Яныг таквс этпост омам ёт эрнэ нэпакыт щөпитаңкве ялсумән ос хури вәрсум. Омам тонт номылматас, хумус тав Хальүст паспортыл майвес ос тот опаришнамөтыл нөтнэг хасхатуңкве эрыс. Ань нэпакум хаснэйивыл люльсаң хот ул вос

пәңктыслум, тыммагыс ос мош хурахласум.

Үст өлнэ Ханты-Мансийский МОМВД кұшаиг өлнэ хум Игорь Полетаев паспортыл мән кәтанувн мисанэ. Ты элы-палт мәкөв эруптан магыс ләгың ләвыс, ёмшакв вос хаништахтасүв ос сәккон щирыл вос өлсүв. Тувыл үс образование департаментыт кұшаиг өлнэ хум Юрий Личкун маңав ос янытластә.

Ты тал Российский Конституция 25 талэ төвлыс, ань та хотал паспортыл маим агитпыгыт акваг номуңкве патыяныл.

Потыр мәнщи ләтңыл Т. Мерован хасвес.



Ягрим нъяврамыт ялпың хоталт муйлысыт

Руц махум щирыл Йильпи тал январь этпос овыл щислат овылтахты. Маныщит ты этпос тал котиль этпосыг лавияныл, тыммагсыл пёс йис порат сасса махум тамле ялпың хотал ат вэрыгласыт. Маныщит, хантыг хосат тагыл руц мир халт олэгыт, ты ялпың хотал янытлаңкве ань ос патсыт.

Тав Ягрим павылт сасса махум ремёсла центрыт рупитан хотпат маныщи, ханты нъяврамыт Йильпи тал овылтахтын кастыл ялпың хотал вэрыгласыт. Нъяврамыт стихыт ловиньтасыт, эргыт эргысыт ос савсыр пумыщ ёнгыл ёнгасасыт.

Та павылт олнэ маныщи, ханты махум ремёсла центр-колн ватихал ань акван-атыглавет. Ювле хультум талт ват саграпнал этпост маны нъяврамыт, шко-

лат ханищтахтын агитпыгыт ос яныгхотпат округув янытлан хотал янытлаңкве тув вэвыглавэсыт. Тот рупитан нэт савсыр пёс пормасыт суссылтасаныл ос тув ёхталам мирн маныщи, ханты олупсаныл урыл погыртасыт.

Ювле хультум тал округув 900 талэ товлыс. Ты элы-палт учёныт савсыр пёс нэпакыт ёмашакв ловиньтасыт ос лумав урыл тот латың хонтсыт. Та пасныл Югра мав тасавит



талыл ловиньтаңкве та патвес.

Ремёсла центрын ёхталам мир ты пумыщ вэрмал урыл ос погыртавэсыт, хоты пёс нэпакыт мав лумав урыл манхурип латың хансым олы. Аквта суссылтапт хул алыщлан ос вэраян махум пормасын суссылтавэсыт.

Ягримт олнэ мир ты выставка сунсуңкве

пуссын вэвыглавет. Тамле эрнэ вэрмал ремёсла центрыт рупитан хотпат акваг вэрыглэгыт, та павылт олнэ савсыр сасса махум танки пёс йис вэрмалыныл урыл савнув вос вэгыт ос мот мирыт мав культурав ос вос янытлыяныл.

**Г. Вынгилева потре
маныщи латныл
Л. Теткина хансытэ.**

Хурит сунсыглым лумма мирыт вавет



Ань павлытыт олнэ маныщит, сараныт, ёрныт олупсаныл вос касалавес, Ханты-Ман-

сийск уст «Мавит ос Элумхолас» нампамузейт пумыщ суссылтап вэрыглавес. Лумма мирыт хумус олэгыт, маныр вэрэгыт, маныр оныщэгыт, тот хурит сунсыглым пуссын ханищтаңкве рэви.

Ты маньлатхум Илья Абрамов тав 2011 тал пасныл 2018 тал муспослум хуриянэ. Тав Екатеринбург уст олы, тот история ос археология институтт рупиты. Лов арыгкем тал ювле хультум порат маныщи махманувтыл пумшалахтуңкве па-

тыс ос тан олнэ павлытын ялыс, сав щемьят ёт вайхатас. Тав вэраян, хул алыщлан, салы урнэ хотпат хурин послыяне. Ань атпан арыгкем хуриянэ суссылтавет.

Илья лавыс: «Ам ты хотпат ёт румалахтасум, тананыл пуссын вэганум. Товат савалым олэгыт, олн сэлункве рупата ат оныщэгыт, тан туп хул алыщлым ос вэраим олэгыт, маныр каттын-паттэгыт, таи тэпьялэгыт. Салы урнэ махум палт ос ялсум, тан олупсаныл ос тарвтың. Ос тох олы,

ты махманув таксарыг олэгыт, танки халанылт ошхуль вэрэгыт».

Суссылтап овылтыт Ас-угорский институтт рупитан нэ Светлана Алексеевна Попова сав ёмас латың лавыс. Будапешт усныл ёхталам нэ Чилла Хорват хурит ос суссанэ. Тав лавыс, ты хурит Венгрия мав тотыгланувет ке, сака ёмас олнув, тан щань латың щирыл рут махманылтыл сака пумшалахтэгыт.

**Тамара
МЕРОВА**

Лумма сэрипос

(Северная зоря)
№1 (1187), 10.01.2019
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467)33-22-72

Заместитель гл.редактора –
Кондина Г.Р.
Телефон (3467)33-22-72

Ответственный секретарь –
Уэль В.В.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399

Тираж 1710 экз.

Заказ 0002

Цена свободная

**Мнение авторов
публикаций не
обязательно отражает
точку зрения редакции.**

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.